


Eugène IMBERT

IS ALISCAMP



COUROUNO DE PERVENCO

A VAURIAS — VAUCLUSO

VERS L'AUTOUR, OUMOURNIÉ DIS OURSULINO
1891

IS ALISCAMP

*Lou mau es orre, e me souris;
La car es bello, e se pourris;
L'oundo es amaro, e vole béure;
Alangouri,
Vole mouri
E viéure.
(Lis isclo d'or.)*

I

LOU CHAPLADIS DE LERIN

ODO ISTOURICO

*Floucado dóu segound près, uno medaio d'or de 300 franc,
i jo flourau dóu Centenàri de Lord Brougham, à Cano,*

Dedicado à Teodor Aubanèu.

*Arabes gladio enecant.
Lis Arabi chaplon.
ZIDORO DE BEJA.*

I

L'ENVASIOUN

Au calice amar de l'angòni,
— Li libre n'en fan testimòni,
Prouvènço, as amoura ti labro de courau!
Dóumaci de Diéu siés l'amigo:
Quau bèn saup ama bèn castigo;
Fau trissa lou rasin, l'espigo,
Pèr aguè lou gran d'or e rempli li baran!

Li Franc voulien sout soun empèri
Te gibla... Dins un refoulèri,
Pulèu que de courba toun front sout soun taloun,
Sounères aquéu pople alabre
Qu'a pèr religioun la dóu sabre,
Que trefoulis sus li cadabre...
Lèu! Lèu! Li Sarrasin venguèron à mouloun.

- *Allah, ad Bar! Allah ad Bar!* cridavon,
Sus si cavalo s'abrivavon;
Li cresiés de sauvaire, e sigué de bourrèu!
Abari dedins lis androuno
Di serpatas e di liouno,
Espoutiguèron ta courouno
E cauquèron i pèd tis ile blanquinèu.

Enlissa pèr si faus proufèto,
Ravassejavon la counquètò
De l'Uropo... Adeja l'Espagno avié feni;
La paureto èro encadenado,
Ié soubravo qu'uno manado
De sódard valènt; èro anado
Dins li baus d'Asturìo escoundre l'aveni.

E tu perèu ères doulènto,
O ma Prouvènço redoulènto!
Lavaves toun pecat dins un flume de sang!...
Pauro Lourrèno! Pauro Alsaço!
Voste tiran n'es rèn en faço
Dóu Sarrasin!... *Sa soulo traço*
Rendié la terro drudo esterlo pèr sèt an (1).

(1) Prouvèrbi.

Mai descadenavon sa ràbi
Subre-tout li cifèr Aràbi,
Dessus li tèmple sant, dessus li mounastié;
Cresien — coume vuei n'i'a que creson —
Qu'aqui li lounvidor se greson,
Quand, au countràri, li mespreson;
E sagatavon tout sènso ges de quartié.

II

LOU MOUNASTIÉ DE LERIN

Alin, dóu caire de Marsiho,
I'a d'iscleto, de roucassiho,
Que lou soulèu tremount dauro de si trelus;
Vaqui perqué soun apelado
Lis Isclo d'or... Antan pelado,
Nis de coulobre e de rassado,
Ounourat n'en fagué di sant de Diéu lou brus,

Emé fé, lou sant dins li clapo
Planto soun vièi bastoun, qu'arrapo
E maduro chasqu'an de poumo à canestèu.
Lis auceloun dessus si branco
Canton, nison, douço calanco.
Lou Sarrasin boumbis e tranco
Lou poumié miraculous e tuio lis aucèu.

Dóu tèms d'aquéu pople bejàri,
A Lerin, sout l'abat Pourcàri,
Fiéu de sant Ounoura, li mounge èron noumbrous.
Vòu d'abiho travaiairèlo,
O vòu d'ameto pregarèlo,
Casto, crentouso e sounjarèlo,
Ai! ai! fugissès lèu, veici 'n aurige afrous!

III

LOU CHAPLE

Lou sant Capoulié, dins un soungé,
Vèi de bourrèu chapla si mounge.
Lèu! lèu! pèr l'Italio embarco li jouvènt.
Is autre dis: - Lou tèms es nivo,
Mi fraire; un aragan s'abrivo
De vers nautre..., tant lèu arrivo:
Poudès fuge! — Noun, noun, tóuti dison: restèn!

— Restas? Eh bèn! tant vòu lou dire:
Veici la paumo dóu martire!
Pèr la culi nous fau la gràci d'amoundaut.

Mis enfant, au Diéu que la baio
Anèn la querre!... L'on s'adraio
Vers l'autar..., e la gràci raio
Dins cadun 'mé lou pan e lou vin celestiau.

Sus lou bardat, tèsto clinado,
Lou cor siau, l'amo enserenado,
Prègon dins la grand glèiso: is angeloun fan gau...
Ai! ai! veici lis ensucaire!
A Marsiho, dins Sant-Sauvaire
Vènon d'escoutela, pecaire!
Quaranto vierginèlo!... An franchi lou lindau.

— Nous fau d'or! bramon li barbàri.
— D'or? N'avèn ges, ié dis Pourcàri;
Car travaïen pèr vièure e viven pèr prega.
Alor li maufatan s'enlisson,
Renègon, sus li crous boumbisson,
Lis embrenigon, demoulisson
Lis autar... Las! moun Diéu! coumençon de sega!

S'entènd plus que lou vanc di sàbre
Que chaplon, chaplon... Li cadabre
Dins lou sang vermeiau s'aleiron en tombant.
E li martir mourènt, pecaire!
Dison coume a di lou Sauvaire:
- Perdounas ié, Diéu, noste Paire!
Soun avugle... Perdoun! noun sabon ço que fan!

Pèr espaventa li pu jouine,
Chaplon d'abord que li vièi mouine
Li bregand. Mai li jouine iston siau e valènt,
Quand vèn Sant-Jan, que li seisseto
Coum'un fiéu d'or soun proun rousseto,
La daïo crussènto sarreto
Lis espigau... Ansin toumbon mai li jouvènt!

N'i'a plus rèn que quatre d'en vido:
Soun noble e bèu... La chourmo avido
Li pren, quand a piha, crema lou mounastié,
Coume se dèu lis encadeno,
E sus soun bastimen li meno.
Mai li jouvènt, — noun sènso peno, —
S'esbignon.. A Lerin, ah! tournon vonlountié!

Plegon dins si raubo nevenco,
De soun sang tóuti purpurenco,
Si fraire... Dins si cros li clinon, pregadis;

Pièi, canton: — Amo subre-bello,
Au brut di vago bressarèlo
Dourmès en pas! L'umblo jitèlo
Dóu poumié 'spalanca tourna-mai reverdis.

O Lerin, isclo benurouso!
Noun siés uno terro abarouso;
Quet sòu dru madurè jamai talo meissoun?
Aro coum'i vièi jour flourisses;
Coum'un bèl ile t'espandisses,
Sies redoulènto, e sempre ausisses
Dis auceloun de Diéu li pïóusi cansoun!

Cencha de courouno reialo,
Vesti de raubo vermeialo,
Dins l'éterne estrambord, sant martir, sias rejoun!
Sus la Prouvènço, vosto maire,
Sus li Felibre, vosti fraire,
Sus lou jouvènt, voste cantaire,
D'amount, à bro, larga vosti benedicioun!

Au calice amar de l'angòni,
— Li libre n'en fan testimòni —
Prouvènço, as amoura ti labro de courau,
Dóumaci de Diéu siés l'amigo:
Quau bèn saup ama bèn castigo;
Fau trissa lou rasin, l'espigo,
Pèr aguè lou gran d'or e rempli li barau.

#####

II

— LI RECÀTI —

PICHOT POUÈMO

I

Ai vist, dins ma caminado,
Un gros clot de bouissounado
Que m'a dis: — Me fai grand gàu
D'abriga li prim rigàu,
D'ivernado
Sautourlejant pichot gàu.

II

Ai vist, dins ma caminado,
Uno turno abousounado
Que m'a dis: — Me fai grand gàu
D'abriga, dins mi casau,
La meinado
Di limbert qu'amon la caud.

III

Ai vist, dins ma caminado,
Uno bono cantounado
Que m'a dis: — Me fai grand gau
D'abriga li vièi frejau,
Dis annado
Troussa coume d'espigau.

IV

Ai vist, dins ma caminado,
Uno grand' pèiro clinado
Que m'a dis: — Me fai grand gau
D'abriga dedins si nau
La blancado
Dis os di pauri mourtau.

V

Bouissoun, rouïno e calanco
M'an vist passa; mai la blanco
Pèiro que rescound li mort
M'a vist à geinoun au bord,
Clinant l'anco,
Prega Diéu de tout moun cor.

#####

III

— LA MORT DOU PAPO PÌO IX —

Din! Dan! Doun!
Plouron li campano.
Doun! Doun! Doun!
Gemis lou bourdoun
De Nosto-Damo-di-Doum.
Tóuti li clouchié d'Avignoun
Mesclon si pietadous trignon,
Din! Dan! Doun!

Lou Papo es mort!
Noun, es pas uno engano!
Lou Papo es mort
Aièr de vèspre! O sort!
Pìo-Nòu èro un sant d'abord!
O maluranço! O crèbo-cor!
Lou Papo es mort!
Lou Papo es mort!
Din! Dan! Doun!

Plouron li campano!
Doun! Doun! Doun!
Gemis lou bourdoun
De Nosto-Damo-de-Doum!

Quau l'aurié di?
Dempieù quàuqui semano
Èro gari;

Disien: — Es fres e fort...
Aro sonon si clar à-bord...
O maluranço! O crèbo-cor!
Lou Papo es mort!
Lou Papo es mort!
Din! Dan! Doun!
Plouron li campano
Doun! Doun! Doun!
Gemis lou bourdoun
De Nosto-Damo-de-Doum!

Jeuse, moun Diéu!
E vous, Maire abelano,
L'infèr catiéu
Triounfo! Acò 's trop fort!
Fanot trignolo em' estrambord!
O maluranço! O crèbo-cor!
Lou Papo es mort!
Lou Papo es mort!
Din! Dan! Doun!
Plouron li campano.
Doun! Doun! Doun!
Gemis lou bourdoun
De Nosto-Damo-de-Doum!

Dins noste cèu,
Qu'un laid nivo encabano,
O! fasès lèu
Lusi quauque rai d'or!
Segnour, menas-nous à bon port!
O maluranço! O crèbo-cor!
Lou Papo es mort!
Lou papo es mort!
Din! Dan! Doun!
Plouron li campano!
Doun! Doun! Doun!
Gemis lou bourdoun
De Nosto-Damo-de-Doum!

Deja l'uiiau
Anouncio la chavano;
E l'infèrnau
Vai faire un grand effort
Pèr esclapa la tiaro d'or!

O maluranço! O crèbo-cor!
Lou Papo es mort!
Lou Papo es mort!
Din! Dan! Doun!
Plouron li campano.
Doun! Doun! Doun!
Gemis lou bourdoun
De Nosto-Damo-di-Doum!

Sus lou mount sant,
Dins uno orro marrano,
Quand Jeuse en sang
Espiro — amar record! —
Li blu tiron sa raubo au sort!
O maluranço! O crèbo-cor!
Lou Papo es mort!
Lou Papo es mort!
Din! Dan! Doun!
Plouron li campano.
Doun! Doun! Doun!
Gemis lou bourdoun
De Nosto-Damo-de-Doum!

Li fiéu d'infèr,
Chourmo tant mafautano,
S'abrivon fèr,
Contro la Glèiso à-bord!
Mai Diéu la sousto: es lou pu fort,
E la Papauta jamai mort!
O benuranço! o dous record!
Lusira mai la tiaro d'or!
Doun! Doun! Doun!
Rison li campano.
Doun! Doun! Doun!
Canto lou bourdoun
De Nosto-Damo-de-Doum!

Tóuti li clouchié d'Avignoun
Mesclon si jouious carihoun.
Din! Dan! Doun!

#####

IV

— LA SANTO OUSTESSO —

ODO ISTOURICO

Qu'a óutengu un diplome d'óunour à Sant-Rafèu.

In memoria æterna erit justus;
ab auditione mata non timebit.
(P. CXI.)

*Dóu juste l'etèrno memòri
Di lengo noun cren lou tafòri.*

D'un vièi raconte de Prouvènço
Vole refaire la jouvènço;
E se d'ùni, — pèr mescrenço, —
Encuèi volon pas l'encapa,
Maugrat que siegue en forço libre,
En soun voulé demoron libre.
Pèr iéu, dins moun cor de felibre,
Lou crese francamen, o lou countariéu pas.

Èro, autro-fès, dins l'Aquitani,
Jòrgi emé Front, dous capitani,
Dous evesque pas mòu, oh, nani!
Predicavon la santo Crous.
Mai li pagan, pople bejàri,
Coursejèron li missiounàri
Jusqu'à Tarascoun, — pèr —
Ount' Marto emé respèt li recatè toui dous.

Bèn pauro èro la santo fiho;
Mai toujours, coume à Betanìo
Pèr Jèsus e pèr sa pauriho,
Tenié de viéure aprepara;
Toujour de pan sus la panièro,
Au fogan un fai de broutièro,
Toujour milo bòni manièro.
— Quau douno au paure, amount cènt cop mai reçaupra!

Lis Aquitan s'amansiguèron.
De Tarascoun quand partiguèron,
Lis evesque à Marto diguèron:
— Coumo pourren vous gramacia?
Que voulès que cadun vous lègue?
— Espère que la mort me sègue
Tant-lèu, mi fraire. Oh vous n'en prègue!
Venès m'ensepeli, se 'n vido encaro sia!

— Ansin sara. Pièi quand l'annado
Tant-lèu anavo èstre abenado,
Marto veguè sa sorre amado,
Madalèno, mounta vers Diéu.
Lis ange l'avien sus sis alo
Lumenouso; de sis espalo,
Floutavo uno raubo pourpalo,
E Marto souspirè: — Segnour, quouro es pèr iéu?

Èro pèr elo!... Amalautido,
Sentié daise esquiha sa vido.
Oh! davans sa fàci ravidò,
Vesèn Madalèno e sant Jan,
Trefoulis!... — Venès-ti me quèrre?
Gemis. Languisse, tant qu'espère!
— Dins tres jour, respondon, ti ferre
Saran descadena: vers Diéu prendras toun vanc!

E, tres jour, la Vièrge amourouso,
Couchado sus 'no crous cendrouso,
Souto un aubre, esperè courouso
L'ouro de soun lum amoussa.
Enterin demandè leituro
Dóu tros de la Santo Escrituro
Ounte dóu Crist i'a li tourturo.
E, quand Jeuse espirè, Marto agué trespasa.

Un cris mountè de l'assistanço:
— Las! Pins touto la vesinanço,
L'aguè 'n inmènso estransinanço.
Tres jour pèrtout que plang e lum!
Tóuti disien: — La Santo es morto!
Tóuti vers èlo èron pèr orto;
Tóuti, voulèn èstre à l'escorto,
Venien de liuen: di mas, di colo e di palun.

Au cant di *Saume*, vers la toumbo,
Pourtavon la casto coloumbo,
Quand pareiguèron, dins la coumbo,

Dous estrangié vesti de blanc.
La foulo badanto amiravo
Li dous pountife à fàci gravo:
Uno clarta lis entouravo;
Avien l'èr que-noun-sai pietadous, abelan.

L'un, avenèn sus touto idèio,
Semblavo aquéu que la Judèio
Belè tres an, pèr si mervèio;
Avié 'n bèu libre tout daura.
L'autre èro Front, lou d'Aquitàni,
Un di dous valènt capitàni,
Pèr precha la Crous pas mòu, nàni,
E que Marto, en soun mas, avié 'ntan retira.

Front i pèd e Jeuse à la tèsto,
Au cros davalèron li rèsto
De l'Oustesso; e pièi, à la lèsto,
Cadun subran dispareiguè...
Dins lou libre i caire d'ebòri:
— *Dóu juste l'eterno memòri,*
Di lengo noun crèn lou tafòri,
Lou pople a chasco pajo emé gau legiguè...

Sus soun sèti, Front penecavo
A Perigus, e bachoucavo;
L'ouro dóu prone s'embrecavo.
Lou pople languissié... Ravi,
L'evesque s'aubouro: — O mi fraire,
Dis, en Diéu vèn just de se jaire
La santo Oustesso dóu Sauvaire!
Benurous soun mis iue d'aguè vist ço qu'an vist!

— Noste-Segne èro à la testièro,
Bèu coume 'n brout de genestièro,
De pople, oh! quanto longo tièro,
Pèr faire óunour, pïous eissam!...
Mai vès, la marco! à mi man blanco,
Plus ges de gant!... moun anèu manco!
Anas-li querre: an resta 'n banco:
Lis ai leva tant-lèu pèr touca lou cors sant...

Li messagié lèu-lèu s'apreisson
Vers Tarascoun. Ié recouneisson
L'anèu, li gant de Front. N'en lèisson
Un coume provo dóu vrai.
Enjusqu'au jour dóu grand auvàri
L'an garda dins un relicàri;

Mai, dins l'espetaculous esglàri,
S'es perdu, devouris pèr l'infernau varai.

D'un vièi raconte de Prouvènço
Voulièu refaire la jouvènço;
E se d'ùni, — pèr mescrenço —
Encuei l'an pas vougu 'ncapa,
— Maugrat que siegue en forço libre, —
En soun voulé demorou libre.
Pèr iéu, dins moun cor de felibre,
L'ai creigu francamen o l'auriéu pas counta.

#####

V

— IS ALISCAMP —

LEGÈNDO

A M. Véran, architèite de la vilo d'Arle

— *Dis Aliscamp lou cementèri,
Plen de miracle e de mistèri,
Plen de capello emai de cros
E tout gibous de mouloun d'os...*
Nèrto, cant V, p. 262.

Es toucant d'Arle
Lou clot necrous
De quau vous parle,
Rempli de crous;
Andano vièio,
Dins lou trescamp,

Entre dos lèio
De cros marcant.

De quet tèms dato?
Pas res lou saup,
Car lou descato
Ges de missau;
Mai la legèndo
— Justo bessai —
Elo lou rèndo
Sant que-noun-sai.

Dis: — Sant Trefume
Faguè veni
Aquito mume,
Pèr lou beni,
Si noble fraire,
La mitro au front;
Mai de lou faire
Res a lou front.

— Es Noste-Segne
Qu'apareiguè
E, de soun segne,
Lou beniguè,
De la grand plano
Bluio d'amount,
Couchant l'engano
Di laid demoun.

Sachènt la causo,
Dóu bèu pu liuen,
D'aguè sa lauso,
Tous prenien siuen,
Lou coumandavon
Pèr testamen,
Lou demandavon
Au bon moumen.

E lou grand Rose
Morne, à-de-rèng,
Pourtavo i crose,
Sus soun courrènt,
Li mort en caisso
'Mé de mouchoun,
Filant i baisso,
— Lou près rejong. —

A Trencotaio (1)
I'avié 'n fielat
Timblant si maio,
Pèr encala.
Li fichouiravon
A l'embruni,
E li pourtavon
Au clot beni.

(1) Bourgado d'Arle religado à la vilo pèr un pont.

Aquèu mistèri
Bèn pretoucant
Dóu cementèri
Dis Aliscamp
Provo une causo:
Es qu'autrofé
S'avié de causo
Emai de fé.

Noun se pensavo
Rèn qu'au gazan,
Ni despensavo
Tout 'n s'amusant,
Sèns siuen de l'amo
Emai dóu cors,
Que Diéu reclamo
Après la mort.

#####

VI

— A MA MAIRE —

SOUNET

I'a mai de vint an que s'es enanado,
Ma maire, vers Diéu; vint an n'es pas 'n jour!
E pamens quand vèn Li Mort, chaqu' annado,
Coume s' èro adès, la ploure toujours.

Me farié grand gau, aquesto journado,
D'embeli soun cros paure emé de flour;
Mai siéu liuen e n'ai que la blasinado
De moun cor doulènt que sauno de plour.

E pièi, sus la toumbo ounte la boutèron,
Ni pèiro esricho, e ni crous ié plantèron;
E l'èrbo, en creissènt, a tout atapa.

Lou cros ounte dor lou mies, la paureto,
E que lis erbage ataparan pas,
Es moun cor d'enfant. Pas vrai, meireto?

#####

VII

— TRISTE ROUMAVAGE —

À MOUN FRAIRE MAURISE

Sus la toumbo de moun fraire
M'enchauvié d'ana prega,
Alin liuen dins aquéu caire
Ounte la mort l'a plega.

A Sant-Roumié de Prouvènço,
M'enanère un bèu matin,
Lou cor en grando doulènço,
Lis iue plourous, lou front clin.

Dins lou clot 'ntre qu'arribère
Cerquère lou cros ama;
E, sus lou gravas, tombère
Ounte l'avien estrema.

E plourère, l'amo pouncho
Di sèt glàsi, un bon moumen,
Plus mort que viéu, li man jouncho
E lou cor en mourimen.

A travès lou grès semblavo
Que vesiéu moun fraire ama
Endourmi la fàci blavo,
La bouco e lis iue ferma.

Ah! s'aviéu, coum' à Lazàri,
Pouscu dire: — Aubouro-te!
Mai d'auboura dóu susàri
Diéu soulet a lou poudé!

Pièi, durbè son regard cande,
E, serious, m'arregardant,
Me venguè: — Te recoumande
E ma femo e mis enfant!

— Amo-li, oh! te n'en prègue!
Pren n'en siuen! Aro soun tiéu!
Que lou mau jamai li nègue;
Car lou mounde es tant catiéu!

— O, gardarai ta famiho:
Pos repausa sèns soucit.
Tournò-mai cluquè si ciho
En souspirant: — Gramaci!

Dessus soun cros nus, pecaire!
Sèns un clot d'èrbo, uno flour,
M'entournère pas sèns faire
Planta 'no moudèsto crous.

E, dempièi, alin la vese
La Crous santo que s'estènd
Sus éu: à soun oundro crese
Que dor un pau plus countènt.

#####

VIII

— LAGREMO E COUNSOULACIOUN —

À M. BERT, NOUTARI À L'ILO

*pèr la mort de Madamo Cecilo Bert, nado Farge,
sa mouié bèn-amado*

I

Es just au moumen que la fuèio toumbo,
E vers d'àutri bord s'envolo l'aucèu,
Quo vosto mouié descènd dins la toumbo,
E que sa bello amo escalo lou cèu.

Paure ome! Emé vous toumban de lagremo;

A voste plourun mesclan nòsti plour.

Ah! qu'es douloureux de perdre sa femo,
Meissounado ansin enca dins sa flour!

Ah! qu'es douloureux de vèire, pecaire!
Un jouine ourfanèu dedins vòsti bras,
Subre-tout quand sias, coume vous, soun paire!
Li bèu raive d'or soun plus que d'estras!

II

Pamen lou crestian que ser que se lagne,
Quand li qu'a perdu dins la pas de Diéu
Se soun endourmi? Noun, soun pas de plagne!
Mai que nautre eici, dison que soun viéu!

D'entrin que plouren, soun dins li delice,
Courouna de lus, vesti d'esplendour.
Bèvon dóu bonur l'etèrne calice
E canton à Diéu l'inne de l'amour.

Adounc clinen-nous sout la man divino
Que nous bouto ansin, pèr nous esprouva,
Lou crudèu frountau tout trena d'espino,
Diéu bon saup proun quand lou faudra leva...

III

Es just au moumen que la fuèio toumbo,
E vèrs d'àutri bord s'envolo l'aucèu,
Que vosto mouié descènd dins la toumbo
E que sa bello amo escalo lou cèu.

#####

IX

— L'AUTOUNO ES LA SESOUN DI MORT —

Roumanço courounado à Lioun.

I

Diéu m'a fa touto entristesido;
Clave l'estiéu, durbe l'iver.
Sout moun aleno enfrejoulido,
Campas e prat rèston plus vert;
Li quàuqui flour que soun encaro
Eis abrigant, dedins lis ort,
Perdon la gràci que li paro:
L'autouno es la sesoun di mort!

II

Cave de cros au cementèri
Pèr li jouvènto au front pali;
Lis agouloupe emé mistèri
Eiça quand lou jour a fali.
Escampèire dessus si toumbo
Li fuèio morto i rebat d'or;
Pièi ploure li casto paloumbo:
L'autouno es la sesoun di mort!

III

D'aquéli qu'ensepeliguère
Pèrde jamai lou souveni;
Quand vèn Toussant, de vèrs li serre,
I vau, i plano, à l'embruni,
Pèr li que dormon dins l'andano,
Trase de plang que van au cor,

Li clar doulènt de cènt campano:
L'autouno es la sesoun di mort!

IV

En quau me durbo soun auriho,
En quau me porgo un cor pïous,
Ma voues douçamenet babiho
Aquest counsèu sage e serious:
Acampo, acampo d'obro bono,
Pèr paga toun intrado au port,
Car l'ouro de parti lèu sono:
L'autouno es la sesoun di mort!

#####

X

— DE PROFUNDIS —

SOUNET

Ai! las, pas mejan de dourmi,
Pèr l'orre fiò que nous roumi
E sèmpre revouluno e bramo;
Sian agouloupa sèns calamo!

Ai! las, vàutri, nòstis ami,
Nous leissès pas 'nsin pregemi
Dins la vau crudèlo di flamo,
Ounte an degoula nòstis amo!

Ei-tant-lèu, s'encò dóu pecat
Saren plus un brèu endeca,
S'envoularen de-vèrs la glòri,

E vous pagaren largamen
Li déute d'adoucissamen;
Car li juste an bono memòri.

#####

XI

— PERQUE PLOURES? —

À moun ami l'abat Jousè Meffre, qu'a perdu soun paure paire.

— Noli flere!
Anen, Jousè, ploures pas 'nsin!

I

M'an dis que t'avien vist ploura,
Eici, l'autre jour, quand venguères;
Que dins un caire t'amaguères
Sènso voulé te n'en gara.
Acò, veses, ami, me tranco,
Bouto d'espigno à tnoun couissin!
Lou sabe proun ço que te manco!
Mai, vé, Jousè, ploures pas 'nsin!

Ah! ço que te manco, es toun paire!
Toun paire bon coume lou pan;
Que lou couneissiéu pan pèr pan,
E qu'amave forço, pecaire!

Tant-lèu, souto lou bais divin,
S'es endourmi, l'amo sereno;
Aro eilamount de bonur trèno:
Anen, Jòusè, ploures pas 'nsin!

Toun paire èro un crestian di rude:
Sus lou front pourtavo sa fé.
Èro un di crestian d'autrofé
Que s'en van sèns que res i'ajude.
S'es enana tout soun camin
Amant Diéu coum'un cenobito;
Aro qu'emé Diéu meme abito:
Anen, Jòusè, ploures pas 'nsin!

Toun paire vivié d'esperanço;
Amavo lou Rèi de tout cor:
Aurié baia d'argènt e d'or
E de sang pèr lou Rèi de Franço!
Las! es mort just em' Enri-Cinq.
Ensèn an mounta dins la glòri
Pregon ensèn pèr la vitòri;
Anen, Jòusè, ploures pas 'nsin!

Èro un ome de bèn, toun paire,
E, chaque jour, de si counsèu,
Di riche e di paure perèu
Vous esclargissié lis afaire.
Es aqui qu'a trouva sa fin
Bèn pu lèu; mai Diéu em' usuro
Pago amount lou gò d'aigo puro;
Anen, Jòusè, ploures pas 'nsin!

Ploures pas, car, dins la patrìo,
Nosto-Damo di *Quatre-Abas*,
L'a rejoung dins lou grand soulas.
Aro emé li Sant s'enebrìo
I sourgènt de l'amour divin;
Touto soun amo benurado
Se sènt plus de la mau-parado:
Anen, Jòusè, ploures pas 'nsin!

Te soubro enca 'no bello branco,
Se toun pège s'es acranca.
As ta maire, ta maire enca,
Ta santo maire pèr calanco.
Pregas ensèn, e lou front clin,
Dessus lou cros ounte repauso,

D'entrin qu'amount vèi Diéu, lou lauso:
Anen, Joused, ploures pas 'nsin!

Sus aquelo toumbo fermado
Voudriéu peréu rn'ageinouia,
Emé vâutri dous, i'esfuia
Prièro e flous tout embeimado:
Rose, inmourtalo e jaussemin;
Mai li plour qu'ennèblon ma visto
Soun flour de dōu li pu requisto:
Anen, Joused, plouren plus 'nsin!

#####

XII

— FLOUR DE PARADIS —

À moun ami l'abat J.-M. que plouro sa Santo Maire

Dins la pas de Diéu vèn de s'endourmi,
Ta piouso maire; e tu, paure ami,
Sus soun cros tapa ploures ti lagremo;
Ploures sènso-cesso; e, coum' Augustin,
Pos pas t'assoula; dōu vèspre au matin,
Ploures au record de la santo femo.

E bèn, as resoun de la regreta,
Ta maire; èro un ange, un ange à cousta
De tu pèr mena ti pas dins la draio
Dōu bèn, dōu bèn-estre e dōu Paradis:
La man dins la man, lou cor cantadis
Caminavias dré, vuei que tout varaio.

Ta maire èro enda di gènt d'autro-fé.
A l'esprit galoi, au cor plen de fé,

De la grando fé que jamai vanego;
Toujours sourrisènto e toujour pregant,
Dins l'oumbrun de Diéu sèmpre se plegant
E couneissènt pas li pecat di brego.

Ta maire èro bèn la santo de Diéu.
Un jour me disié: — N'ai rèn qu'aquéu fiéu,
E se Diéu lou vòu pèr soun missiounàri,
Ié doune. Ei moun tout, moun tresor, moun sang;
Mai vole en retour que n'en fague un sant!
Nàni, aquéu lengage es pas ourdinàri.

Desempièi qu'amount toun paire èro ana,
Vivias tóuti dous, vèrs soun cros clina,
Escampant de plour, de flour, de prièro.
Mai lou cor doulènt ta maire vivié,
Èro segrenouso e lou mau qu'avié
Es un mau crudèu que tuio e qu'enterro.

De l'ome o la femo entre qu'un di dous
S'es acamina vers lou clot necrous,
L'autre, esvaria, marchò plour i ciho,
Menèbre, front clin, sèmpre ablasiga,
Vèrs lou cros ensèn pèr se i' amaga,
Coum' au nis ama volo l'auceliho.

Dins la pas de Diéu vèn de s'endourmi,
Ta pïouso maire, e tu, paure ami,
Sus soun cros tapa ploures ti lagremo;
Ploures sènso-cesso e, coum' Augustin,
Pos pas t'assoula: dóu vèspre au matin,
Ploures au record de la santo femo.

#####

XIII

— LOU TOUMBÈU DE SANTO MARTO —

SOUNET

La croto de Tarascoun,
Darrié soun autar, rescound
Une toumbo subre-bello,
Que tout venènt baiso e bèlo.

Es aquelo de Martoun,
A Jèsu baïant l'artoun
E menèstro à ribambèlo,
Quand sa sorre, èlo, barbèlo;

De Martoun qu'encadenè
La Tarasco, e samenè
La fe que nous baïo d'alo.

Sarrant la crous sus soun cor,
Courouso es aqui que dor.

Ai poutouna sa sandalo.

#####

XIV

— LA MORT DE ROUMANIHO —

Dedicado au majourau L. de BERLUC-PERUSSIS.

*— Tant que Prouvènço durara,
se levarà lou capèu au nom de Roumaniho.
L. DE BERLUC-PERUSSIS.*

Es mort, lou Rèire! Es mort, lou paire!
Es mort lou valènt capoulié!
Quitant l'estèvo de l'araire,
S'es amaga dins lou grand lié!
Ah! quente dàu pèr lou terraire!
Es ensucant! es acclapaire!
Plouren, Felibre e cigalié!

I

De la lèngo dóu brès, éu, lou sublime amaire,
Lou grand pountife; éu que l'avié
Adóutado coum' uno ourfanèlo sèns maire,
Tirado de sa queitevié;
De la lèngo dóu brès, éu, l'Aposto fidèlo;
Éu, l'amourous de Santo-Estello;
Éu, lou grand Majourau moudèlo;
Quau pourra lou noumbra ço que se ié devié?

II

Un mié-siècle à 'sgaia 'mé si cascareleto
Fasènt giscla la bono imour,
Galoio coum 'un sen brusènt de cimbaletto,
Esvartant di cor la brumour.
Ah! quet benfa de faire ansin rire lou mounde!
De l'empacha de se mourfounde
Dins lou segren, — Estis inmounde! —
Lou franc rire flouris la gau, la pas, l'amour.

III

Ah! l'ausiren dounc plus sa voues tant poupulàri,
Que nous gatihavo lou cor;
Emé soun teta-dous bounias e nouvelàri,
Coume d'un Sant Jan-bouco-d'or!
Ah! l'ausiren dounc plus sa santo parladuro,
Pleno coum'uno pouisso duro,
Bello coume meissoun maduro?
Nàni! l'ausiren plus que dins nòsti record!

IV

Muso de la Prouvènço, anas pèr li campèstre,
Dire pèrtout 'n jusqu'à Paris,
Que lou dai de la mort a sega noste Mèstre
Pèr li conte gai, pèr li ris!
O Muso dóu *Ventour*, qu'à toun cap s'assetavo,
Muso dóu fougau qu'enfestavo,
Muso de Nouvè qu'encantavo,
Emé la *Chato avuglo*, oh! zóu! jitas de cris!

V

Mount' ères, ô Mistral, tu, soun fiéu? — Quet scandali! —
Quand s'es, pécaire abousouna?
O mau-sort! ères liuen!... Batiés li bord d'Itàli;
Barrulaves entour l'Etna...
Car èro tu qu'auries degu barra li ciho,
Tu noste pouèto-Messìo,
Au vièi Jan de ti proufecìo,
A n'aquéu qu'ajudé proun à t'atrahina!

VI

Diéu l'a pas vougu 'nsin! Mai avié vist ta glòri
Qu'es à soun plen pountificat.
E pièi mai èro proun riche de sa belòri
Éu, que jamai l'an vist brounca.
Eh! n'es pas qu'ei siegue encuei quand tout varaio
E dins li camin tors s'estraio,
De persegui l'estrecho draio...
Un pouèto es enca bèn mai de remarca!

VII

Au grèu repaus dóu cros lou meïour s'acamino;
E nòsti majourau s'en van.
L'estello di sèt rai à-cha-pau s'enfroumino:
Auhbanèu a pres li davans!
Ah! quet arsi es aquèu d'aquelo mort nouvello!
N'i'aurié pèr peta la cervello,
Se sentian pas, dins nòsti velo,
Boufa 'n auro de vido e poutènto d'envanc!

VIII

Nàni! perira pas d'acò lou Felibrige,
Coume lou dison quàuqui niais...
La mort es un sagan que passo, es un aurige,
Que s'aliuencho emé son esfrai.
Sus la toumbo di paire uno raço regrèio,
Richo de sabo e porte fuèio
Flour e frucho, e soulèu e pluèio,
Buton li sagatun noumhrous e qu'an bon biais.

IX

O Rèire! dor en pas après talo journado,
Sèns soucit de nàutri felen,
Que seguissen fidèu ta bello caminado,
Plen de courage emé d'alén.
Que lou mes de mai dins si flour t'ensepeligue.
Ounte fau que tout s'esvaligue,
Que de bais prefuma te ligue,
Acata pèr la nèu di poumié nadalen.

#####

XV

— PENSAMEN —

SOUNET

Quau se souvendra de noste passage
Se 'n-cop saren mort? Ai las! res, belèu!
Res gardara l'èr de noste visage:
Moro la clarta quand mort lou calèu.

Aurian-ti viscu 'm'un renoum de sage,
Coume entre lis astre isto lou soulèu,
'mé de crous d'ounour, plen noste courrage,
Que tout, d'un badaï, s'acclapara lèu.

La tepo que crèis sus li cros ei prounto,
Gréio vigourouso, e cloussejo, e mounto
Tapant lou terrun qu'escound nòstis os.

Mai l'oubli di mort crèis enca pu vite,
Dins li cor uman, e i'a res qu'eivite
L'aneiantimen soubeiran dóu cros.

© CIEL d'Oc – Juliet 2011